

20.01.2023

La Quotidiana

venderdis, ils 20 da schaner 2023

## Il portal d'annunzia per la Trofea Péz Ault ei aviarts

En rodund dus meins – sonda e dumengia, ils 18 e 19 da mars 2023 – ha la proxima concurrenza da turas dalla Trofea Péz Ault a Mustér liug. Il portal online per s'annunziar per ina ni l'otra concurrenza ei aviarts. La sonda sera porschan ils organisaturs cun *Giochen Bearth* sco president alla testa, ina concurrenza verticala. La partenza dalla cuorsa ei allas 17.45 spel Catrina Resort, l'arrivada ei a Caischavedra. Ella mesira 4,65 km e ha ina differenza d'altezia da 676 meters. Alla cuorsa san dunnas, umens e junior(a)s separticipar. La dumengia ein las duas cuorsas el territori da Caischavedra – Péz Ault sil program. Dad ina vart ei quei la cuorsa Verclisa cun ina distanza da 14,3 km ed ina differenza d'altezia da 1640 meters, da l'otra vart la cuorsa Gendusas ch'ei cun 10,87 km empau pli cuorta. Ella meina sur ina differenza d'altezia da 952 meters. In'interessant arranschament ei la Trofea Péz Ault era per aspectaturas ed aspectaturs. Els san perseguitar las concurrenzas dil territori da skis anora. Grazia als indrezs da transport dallas Pendicularas Mustér SA ei igl access al territori confortabels. (fmr/hh)

\* Ulteriuras informaziuns [www.trofea.ch](http://www.trofea.ch).